



KOMUNIKADO PA PRENSA

Fecha

1 di òktober 2015

Accountmanager

Jhanirha Da Costa Gomez-Anita

Email

jhanirha.anita@gobiernu.cw

REGULASHON DI OKUPASHON ILEGAL DI TERENO PÚBLIKO I KONSTRUKSHONNAN ILEGAL

Willemstad – Resientemente, Gobièrnu a informá komunidad ku ta bai kuminsá ku un maneho pa regulá e kantidat grandi di mas o ménos 10 mil konstrukshon ilegal na Kòrsou. Gobièrnu a splika ku tin hasta barionan kompletu kaminda di forma ilegal a okupá terenonan. Tambe a konstruí edifisionan sin pèrmit.

Ta importante pa nos tur realisá ku okupashon di tereno ilegal ta ensera ku no ta respeta propiedat di un otro; i ku esaki pa motibu di falta di fasilidatnan basiko ta kondusi na gastu finansiero ekstra haltu pa nos komunidad; i ku konstrukshonnan ilegal no a keda evalua riba nan solides di tal forma ku nan por forma un peliger pa e habitantenan. E falta di planifikashon di espasio publiko, karetera, riool, rooi etc. ademas ta krea mas desòrdu i empobresimentu di nos barionan. Tambe ta sumamente robes ku no ta respeta orden di outoridat. Esaki siendo ku ta boga otro ora pa mas kontrol i orden na Kòrsou. Kòrsou por prospera solamente a base di orden, desensia i disiplina.

Ministerio di Tráfiko, Transporte i Planifikashon Urbano (VVRP) huntu ku Ministerio di Hustisia i Ministerio di Finansa lo traha pa realisá e regulashon i legalisashonnan nesesario atraves di un proyekto di mas aña. Na mes momentu ku Gobièrnu a anunsiá e maneho di regulashon, Gobièrnu a informá ku ta hala un strepi bou konstrukshonnan nobo ku ta ilegal.

E proseso di regulashon i legalisashon ta lo siguiente. Na momentu ku Gobièrnu risibí un petishon pa legalisashon di un konstrukshon ilegal òf di un okupashon ilegal di tereno, Domeinbeheer huntu ku Servisio pa Planifikashon Urbano (ROP, ántes DROV) ta hasi un análisis planológiko. E análisis aki ta basa riba nos leinan i maneho di Gobièrnu pa wak si e konstrukshonnan ilegal eksistente por wòrdu legalisá òf no.

Durante di e análisis, ta tene kuenta entre otro, ku si tereno ta di famia i ku EOP; i lo sigui ku regulashon di e tereno i/òf e konstrukshon kaminda ta posibel. Sinembargo, kaminda Gobièrnu stòp e konstrukshon, e persona envolví mester stòp di konstruí paso e ta kore e riesgo ku mester eliminá e konstrukshon.

Den e último dianan, tabata tin atenshon den diferente medio di komunikashon pa un kaso di okupashon ilegal di tereno i di konstrukshon ilegal.

Djabièrnè 25 di sèptèmber último, a eliminá un konstrukshon den Kaya Harisia na Montaña Abou. Den e kaso aki tabata tin tantu okupashon ilegal di tereno di Gobièrnu, komo di konstrukshon ilegal.



KOMUNIKADO PA PRENSA

Fecha

1 di òktober 2015

Accountmanager

Jhanirha Da Costa Gomez-Anita

Email

jhanirha.anita@gobiernu.cw

Promé ku a yega na e desishon pa eliminá e konstrukshon den e kaso menshoná, **a bisa e persona diferente biaha pa e no sigui konstruí** miéntras ku ta hasiendo e análisis pa determiná si por dun'é e tereno na erfpacht of no, i si por dun'é e pèrmit pa konstrukshon of no.

E persona den e kaso aki, a entrega un petishon pa legalisashon di e konstrukshon dia 8 di yanüari di 2014. A konstatá sin embargo, ku e persona a sigui ku e konstrukshon miéntras ku su petishon pa legalisashon ta den proseso ainda. Pues e no a stòp i warda riba tratamentu di su petishon. Dia 14 di mei 2015, instansianan di VVRP a konstatá ku tabata tin konstrukshon di fundeshi i muraya di blòki pa kura. Dia 21 di mei 2015, Domeinbeheer a pone un bòrchi di atvertensia pa indiká ku mester stòp tur aktivitat ilegal mesora. Pa dia 17 di ougùstùs 2015, a konstatá ku a basha e bòrchi abou.

ROP a saka un asina yama 'stopbrief' pa e persona aki i den sèptèmber a konstatá ku tòg a sigui konstruí apesar di tur e atvertensianan di parti di Gobièrnu. Gobièrnu a bisa e persona aki na diferente okashon, tantu verbalmente komo por eskrito, pa stòp tur trabou di konstrukshon inmediatamente. E kontròlnan aki a tuma lugá huntu ku Kuerpo Polisial. Mester suprayá ku ademas di okupá tereno di forma ilegal i konstruí ilegal, ta sumamente robes ku no ta respetá órden di outoridat.

A base di e análisis rekerí, dia 25 di sèptèmber 2015, a yega na e konklushon ku no por legalisá e konstrukshon konserní i a laga eliminá e konstrukshon. Ta bon pa menshoná ku persona no tabata biba den e konstrukshon na momentu ku a eliminá esaki.

Por último, Ministerio di VVRP ta mostra riba e hecho ku no mag inkriminá personal di un servisio di Gobièrnu ora ku esaki ta hasi su trabou pa yuda regulá Kòrsou. Den e kaso aki, a menshoná i asta kulpa un empleado públiko. Esaki por ta un peliger pa seguridat di e empleado i pa e motibu aki, no ta akseptabel. VVRP lo hasi denuncia sin mas di tur menasa ku su empleadonan risibí den kualke forma.